

Inatsisissatut siunnersuummut oqaaseqaatit

Oqaaseqaatit nalinginnaasut

1. Inatsisissatut siunnersuutip tunuliaqutai

Naalakkersuisut 2011-mut aningaasanut inatsisissamut atatillugu avatangiisinut akitsuummik atuutilersitsisinnaaneq nalilersorsimavaat, taamaaliornikkut Landskarsip isertitassai amerlisin-niarlugit ilutigitillugulu Naalakkersuisut avatangiisitsinnut pitsanngorsaataasinnaasunik suliniuteqarusunnerat piviusunngortinniarlugu.

2011-mut aningaasanut inatsisissap isertitassatigut aningaasartuutissatigullu naligiissumik angusaqarfiunissaa Naalakkersuisunut pingaartuuvoq. Siunnersuut saqqummiunneqartoq taamatut angusaqarnissamik qulakkeerinissamut pingaaruteqarlunilu pisariaqavippoq. Kalaallit Nunaata aningaasaqarniarnikkut atugassariumaagassai nunarsuarlu tamakkerlugu aningaasarlirneq eqqarsaatigalugit pisariaqarpoq isertitanit annertunerunngitsunik aningaasartuuteqarnissaq.

Inatsisissatut siunnersuutikkut aammattaaq atuutilersinniarnearpoq kiassarnermut, innaallagissiornermut aammalu motorimut ikummatissanik ilaatigut uuliamik benziinamillu atuinermi mingutsitsinermut akitsuusiinissaq. Akitsuut silaannarmik mingutsitsinnginnerusunik atuinermut ikaarsaariartornissamut kajumissaarutaassaaq. Akitsuutip kingunerisaanik uuliap aamma benziinap assigisaasalu akiisa qaffannerat uuliamik benziinamillu atuinerup annikillinisaanik nassataqassangatinneqarpoq. Taamaamat Naalakkersuisut isumaqarput siunnersuut Kalaallit Nunaanni ilaatigut CO₂-mik aniatitsinerup annikillisinneqarnissaanut ilapittuutaassasoq.

2. Inatsisissatut siunnersuutip imai

Siunnersuutigineqarpoq uuliat aatsitassanit pisut, aamarsuit, gassillu kiassarnermut innaallagissiornermullu aammalu motorinut ikummatissatut atorneqartut akitsuuteqartinneqalissasut.

Ikummatissat siunnersuummi pineqartussatut siunniunneqartut tassaapput kiassarnermut innaallagissiornermullu imaluunniit motorinut ikummatissatut nalinginnaasumik atorneqartartut tamarmik. Nukissiuutit ataavartut, soorlu seqernup qinngorneranik, anorip nukinganik erngullu nukinganik nukissiuutit siunnersuummi pineqartunut ilaangillat .

Akitsuutip akilersinniarneqarnerani apeqqutaatinneqanngilaq ikummatissat pineqartut Kalaallit Nunaanni piaarneqarneri suliarineqarneriluunniit imaluunniit nunanit allanit maanga eqqunneqarneri. Akitsuutit amerlanerpaatigut nunanit allanit eqqussuinnermut atatillugu akilersinneqartassapput. KNI A/S Namminersorlutik Oqartussat sullissinermik isumaqatigiissuteqarfigalugit uulianik aatsitassanit pisunik eqqussuisuuvoq. KNI A/S taamatut eqqussuinnermi kisermaassisuunngilaq, sullissinissamilli isumaqatigiissut malillugu KNI A/S nuna tamakkerlugu pilersuisussaataavoq. KNI A/S-ili kilisaatinik avataasiortunik, umiarsuarnik takornarianik angallassissutinik umiarsuarnillu Atlantikoq ikaarlugu assartuutinik pilersuinissamut pilsussaataaangilaq. Kilisaatit avataasiortut umiarsuillu takornarianik angallassissutit avataani orsersortarput, tassanilu KNI A/S akunnermiliuttoqarluni nunarsuaq tamakkerlugu unammilleqatigiinnermut peqataavoq. Taassuma saniatigut Kangerlussuarmi Mittarfeqarfiit Statoil aqutigalugu ikummatissamik eqqussuisarpoq.

Aaqqissuussinissap pissusissamisut ingerlanissaa anguniarlugu siunnersuutigineqarpoq suliffeqarfiit nioqqutissanik akitsuusigassanik piiaasut, suliaqartut imaluunniit eqqussuisut uninngasuutinik peqqumaasivittut akileraaruseriffimmi nalunaarsorneqassasut. Aamma annertunerusumik atuisut uninngasuutinik peqqumaasivittut nalunaarsorneqarsinnaapput. Uninngasuutinik peqqumaasiviit uninngasuutit akitsuusigassat pillugit piffissani aalajangersimasuni naatsorsuusiortassapput, akitsuutitaasalu akilernissaannut ullunik 180-inik piffissaqarlutik. Piffissaliussaq eqqussuisup pingaarnarup akiliisinnaajuaannarnissaa eqqarsaatigalugu aalajangigaaavoq.

Uninngasuutinik peqqumaasivittut nalunaarsorneqarsimasut akitsuusigaanngitsumik uninngasuuteqarnissamut akuersissuteqarfigineqarnissamik qinnuteqarsinnaapput. Akitsuusigaanngitsumik uninngasuutit taamaallaat tassaasinnaapput nioqqutissat akitsuuteqarfiup avataanut anninneqartussat naatsorsuussat kiisalu nioqqutissat akitsuusernagit umiarsuarnut timmisartunullu nunanut allanut ingerlaartunut nioqqutigineqartussat naatsorsuussat. Akitsuusigaanngitsumik uninngasuuteqarneq ima paasisariaqarpoq uninngasuutinik peqqumaasiviusoq nioqqutissat uninngasuutitut ilanngunneqartut akitsuutaannik akiliissanngitsoq. Tassa imaappoq akitsuusigaanngitsumik uninngasuuteqarnerup siunertaraa nioqqutissat akitsuusernagit tunineqartussat naatsorsuussaareersut akitsuutaannik akiligassinneqannginnissaq. Nioqqutissat akitsuusigaanngitsumik uninngasuutitut ilanngunneqartut kiassarnermut, innaallagissiornermut imaluunniit motorinut ikummatissatut atornerqarnermikkut akitsuusigassanngorpata akitsuut inatsimmi maleruagassat nalinginnaasut naapertorlugit akilerneqartussanngussaaq.

Suliffeqarfiit aamma ingerlatsiviit assigisaallu uninngasuutinik peqqumaasivittut nalunaarsorneqarsimanngitsut akitsuummik akiliisussaataanerup atuutilernerani erngerlutik akitsuusigassat pillugit nalunaaruteqassapput, akitsuullu kingusinnerpaamik ullut 14-it qaangiunneranni akilerlugu.

Umiarsuarnut timmisartunullu nunanut allanut ingerlaartunut, umiarsuarnut uuliasiortunut gassisiortunullu, kiisalu aalisariutinut nunanit allaneersunut tunisinerni akitsuummik akiliisus-

saatitaanginnissap atuutilersinneqarnissaa siunnersuutaavoq. Siunnersuutigineqarportaaq kalaallit aalisariutaannut 200 bruttotonnage-mik usisinnaasunut tunisinerni akitsuummik akiliisussaataanginnissaq. Umiarsuit timmisartullu pineqartut akitsuummik akiliisussaataanginnissaannut pissutaavoq taakku Kalaallit Nunaata avataani akitsuuteqanngitsumik orserorsinnaanerit, taamaattumillu ingerlatat taakku akitsuummik akiliisussaataanissaat angusaqarfiunaviarani.

Kisianni timmisartunut nunap iluani ingerlaartunut, aatsitassanik piiiaffinnut, aalisariutitut minnernut assigisaannullu orsussamik tunisinerni akitsuummik akiliisussaataanginnissaq siunnersuutaangilaq, tassami ilaatigut eqqarsaatigineqarmat ingerlatat taakku avatangiisinut sunniisarnerat sunniisinaanerallu annikinngimmat, ilaatigullu aamma siunnersuutip isertitaqarnissamut siunertaa eqqarsaatigineqarmat. Inuussutissarsiutit assigiinngitsut akitsuummik akiliisussaataanginnerisigut tapersiinerup kingunerisussaavaa suliffeqarfiit nukissiuutinik atuinermi annertunerusumik atuilernissaat, tamannalu suliffeqarfiit nukissiuutinik atuinermi kinnerulernissaraluannut tassuunakkullu avatangiisinik mingutsitsinermi annikillisaanisaraluannut akerliussalluni. Taamaattorli aatsitassanik piiiaffinnut tunngatillugu siunnersuutigineqarpoq akitsuutip annertussusii 10 procentimut appartinneqassasut, tassami ikummatissat agguaqatigiissillugu annertunerpaartaat avammut nioqutissanik (aatsitassanik) piiianermi tunisassiornermilu atorneqartussaammata, aammalu Kalaallit Nunaanni ingerlatat taamaattut imminut akilersinnaasumik ingerlanneqarsinnaanerit maannakkorpiaq qularnartorujussuummat.

Aammattaq naatsorsuuserineq, akitsuutip akilerneqartarnissaa assigisaallu pillugit aalajangersagaliornissaq siunnersuutigineqarpoq.

Aamma inatsisissatut siunnersuut akileraaruserinermik ingerlatsineq pillugu Inatsisartut inatsisaannut attuumassuteqarpoq. Akileraaruserinermik ingerlatsineq pillugu Inatsisartut inatsisaat ilaatigut maleruagassanik, akileraaruseriffiup nukissiuutinut akitsuut pillugu inatsisartut inatsisaannut atatillugu suliassanik aamma naammagittaalliuutinik suliaqarnerani pingaarutlinnik imaqarpoq, tassa kingusinaarluni akiliisoqarnerani ernialersuinermit tunngasunik, nakkutilliinermit tunngasunik assigisaannillu. Tassa imaappoq akileraaruserinermik ingerlatsineq pillugu Inatsisartut inatsisaanni maleruagassat nukissiuutinut akitsuut pillugu inatsisartut inatsisaannut aalajangiisuupput, soorlu akileraartarnermi akitsuusiisarnermilu inatsisit allat taamaattut, nukissiuutinut akitsuut pillugu inatsisartut inatsisaat ingerlatsinermut tunngasunik immikkut aalajangersaasoqarsimangippat.

3. Pisortanut aningaasatigut allaffissornikkullu sunniutissai

Akitsuutit ukiumut 43 mio. kr.-inik isertitsissutaasartussatut missiliuunneqarput. Naatsorsuutigineqarpoq ikummatissanik nunap iluaneersunik atuinerup appariartorneratigut isertitassat anikilliartuaarnissaat. Taassuma saniatigut Nukissiorfiit innaallagissamut, imermut kiassarnermullu maannakkut akiusut taamaatsillugit, illoqarfinni erngup nukinga atorlugu nukissiorfilinni innaallagissamik kissamillu pilersukkaminnit isertitassaat annertunerussapput. Isertitassat taakku annertunerulissutissaat 7 mio. kr.-nit missaanniissangatinneqarput, taakkulu Nukissiorfiit aningaasanut inatsit aqquutigalugu tapiissutisiaannit ilanngaatigineqassapput.

Allaffissornermut tunngatillugu Akileraartarnermut Aqutsisoqarfiup naatsorsuutigaa suliassaq atugassarititaareersut iluanni isumagisinnaassallugu.

Aamma Namminersorlutik Oqartussanut arlaqartutigut malunnaatilinnik sunniuteqartussavoq.

Nukissiorfiit, ikummatissanik nunap iluaneersunik atuisutut allatuulli aningaasartuuteqarnerulersussaapput. Aningaasartuutaanerulersussat suliffeqarfiup sullitaanut akilersinneqarnissaat naatsorsuutigineqarpoq, taakku innaallagissamut kiassarnermullu akiliinerusalissallutik. Aamma pisortat suliffeqarfiutaat taamatulli akiliinerusalissapput.

Namminersorlutik Oqartussat kommunillu illutaanni innaallagissap akia 2,5 pct.-it missaannik, kiassarnerullu akia 5 pct.-it missaannik qaffassapput.

Aammattaaq akitsuut akit aningaasarsiallu 0,1 pct-ip missaannik qaffannerinik kinguneqassaaq. Tamatuma nalinginnaasumik kingunerissagaluarpaq Aningaasanut inatsimmi kontuni pingaarnerni amerlanerni aningaasaliissutinik qaffaanissaq. Akitsuulli una 2011-mi aningaasanut inatsisissap kontuini pingaarnerni akit aningaasarsiallu qaffaatissaanni ilanngunneqassanngilaq.

Innaallagissamut kiassarnermullu akit qaffanneri kommunit isertitakitsunik tapiiffiginnittartut imaluunniit innuttaasut ilaannik innaallagissamut kiassarnermullu akiliussisartut isumaginninnermut aningaasartuutaasa qaffannerinik kinguneqassapput.

4. Inuussutissarsiutinik ingerlataqartunut aningaasatigut allaffissornikkullu sunniutissai

Innaallagissap kiassarnerullu akitsornerat inuussutissarsiutinik ingerlataqartut tamarmik malugissavaat. Naatsorsuutigineqarpoq suliffeqarfiit ataasiakkaat nukissamik sipaarniarnermikkut aningaasartuutit taakku killilersimaarsinnaassagaat.

Tamatuma saniatigut suliffeqarfiit, pingaartumik assartuineramik suliqaartut orsussap akisunerulernera malugissavaat. Aningaasartuutit taakku atuisunut tutsinneqarnissaat naatsorsuutigineqarpoq. Aamma aalisarnermik ingerlataqartut, unammillersinnaassutsiminnik kalluaasinaasumik aningaasartuuteqarnerulissapput.

Taamatutaaq suliffissuit, ikummatissat nunap iluaneersut atorlugit nukissiuutinik pisariaqartitsisorujussuit siunnersuutikkut eqqorneqassapput. Tamakku pingaartumik tassaapput suliffissuit aatsitassanik piaasut, taakkumi ingerlataasa ataasiakkaat imminut akilersinnaasumik ingerlasinnaanerat annikilleriaateqassaaq.

Inuussutissarsiutinik ingerlataqartut aningaasarsiamik akileraaruteqaataasussat naatsorsornerini akitsuutit ingerlatsinermi aningaasartuutitut ilanngaatisinnaavaat.

Suliffeqarfiit ikummatissanik eqqussuisut, imaluunniit ikummatissanik akitsuusigassaangitsunik pisisut allaffissornikkut suliassaqarnerulaalernissaat naatsorsuutigineqarpoq.

Solaarit kiisalu motorinut benziinat annertussusiat inatsisissatut siunnersuummi 15 grader celsiusimik kissassuseqartillugit uuttugaavoq. Uuttueriaaseq taanna EU-mi nalinginnaasumik atortuuvoq, ilaatigullu aamma nioqputissanik tamakkuninnga Kalaallit Nunaannut eqqussuinermi atorneqartarluni. Nillernerusumik uuttuinermi annertussuseq, 15 grader celsiusimik kissassuseqartumik uuttuinermit sanilliullugu annikinnerusarpoq. Kalaallit Nunaanni kiassutsit aamma kissassutsip EU-mi uuttuisarnermi atugaasup assigiinnginnerisa kingunerisaanik millissut KNI A/S-imut 3 mio. literit missaannik naleqarpoq. Assigiinngissutsinut taakkununga nalimmassaatissamik assigisaanilluunniit inatsisissatut siunnersuummi ilanngussinissaq isumaliutaasimavoq. Tamakkuninngali nakkutilliinissap allaffissornerullu pisariuallaarnissaat pissutigalugu nalimmassaatissamik taamaattumik siunnersuummut ilanngussisoqanngilaq. Tassunga taarsiullugu KNI A/S-ip allallu aningaasartuut taanna akigititaminnik aalajangersaernermini ilannguttariaqassavaat. Tamanna atuisunut sunniuteqassanngilaq, taamaassagaluarpammi orsussap akitsuusikkap annikinneruneratigut akitsuut qaffasinnerussagaluarpat.

5. Innuttaasunut aningaasarsiornikkut allaffissornikkullu sunniutissai

Innuttaasut aningaasaatiminnik atuisinnaanerat siunnersuutip kingunerisaanik annikillissaaq. Innuttaasut tamarmik innaallagissap kiassarnerullu akitsornerat malugissavaat. Aammattaaq biilinut umiatsianullu orsussat akitsornerat innuttaasut malugissavaat.

Innaallagissamut, imermut kiassarnermullu akit aaqquissuussaanerat maannakkut atuuttoq pissutigalugu aammattaaq innuttaasut illoqarfinni erngup nukinga atorlugu innaallagissamik pilersorneqartut, akillu minnerpaaffissaanik akiliisartut innaallagissap akiata qaffannera malugissavaat, taassumami akia akip annerpaaffissaanik qaffaatip affaatut annertutigisumik qaffatussaammat. Kiassarnermut aki nuna tamakkerlugu assigiimmat, qaffariaat tamanut assigiissaaq.

Siunnersuut atuisunut akigititamut naleqqersuutip 0,2 pct.-imik qaffariaateqarneranik kinguneqassanganneqarpoq.

Siunnersuut innuttaasunut allaffissornikkut sunniuteqassanganneqanngilaq.

6. Avatangiisinut pinngortitamullu sunniutissai

Siunnersuut nukissiuutinik sipaarnerulernissamut aammalu nukissiuutinik ataavartunik atuilernissamut kajumissaarutaassaaq. Tamanna Kalaallit Nunaanni CO₂-mik aniatitsinermik anikillisisissaaq, taamalu silaannaap pissusianut iluaqutaassalluni.

CO₂-mik aniatitsinerup appariaatissaanik naatsorsuutigisat paasissutissat pigineqartut tunngavigalugit erseqqilluinnartumik eqqoriarneqarsinnaasimangillat.

7. Naalagaaffeqatigiinnermut Namminersorlutillu Oqartussanut tunngasut

Inatsisissatut siunnersuut naalagaaffeqatigiinnermut tunngasunik isummersorfiunngilaq.

8. Oqartussaasunik soqutigisaqaqatigiinnillu tusarniaaneri

Siunnersuut ukununnga tusarniaassutigineqarpoq: KANUKOKA, Kalaallit Nunaanni Sulisitsisut Peqatigiiffiat, NUSUKA, SIK, KNAPK, Nunatsinni Advokatit, Inuussutissarsiornermut Suliffeqarnermullu Naalackersuisoqarfik, Isumaginninnermut Naalackersuisoqarfik, Peqqisutsimut Naalackersuisoqarfik, Aalisarnermut, Piniarnermut Nunalerinermullu Naalackersuisoqarfik, Ineqarnermut, Attaveqarnermut Angallanermullu Naalackersuisoqarfik, Kultureqarnermut, Ilinniartitaanermut, Ilisimatusarnermut, Ilageeqarnermullu Naalackersuisoqarfik, Nunamut namminermut, Pinngortitamut Avatangiisinullu Naalackersuisoqarfik aamma Aatsitassanut Ikummatissanullu Pisortaqaarfik.

Tusarniaanermi akissuteqarsimapput: Ineqarnermut, Attaveqarnermut Angallanermullu Naalackersuisoqarfik, KNAPK, Kalaallit Nunaanni Sulisitsisut Peqatigiiffiat, Kalaallit Nunaanni Politimestereqarfik, Nunamut namminermut, Pinngortitamut Avatangiisinullu Naalackersuisoqarfik, Royal Greenland, Aatsitassanut Ikummatissanullu Pisortaqaarfik aamma Aalisarnermut, Piniarnermut Nunalerinermullu Naalackersuisoqarfik.

Tusarniaanermi akissutigineqartut ilanngussami takuneqarsinnaapput

Inatsisissatut siunnersuummi aalajangersakkanut ataasiakkaanut oqaaseqaatit

§ 1-mut

Imm. 1-imut

Siunnersuutigineqarpoq uuliat aatsitassanit pisut, aamarsuit, gassillu kiassarnermut innaallagissiornermullu aammalu motorinut ikummatissatut Kalaallit Nunaanni atorineqartut akitsuuteqartinneqalissasut.

Ikummatissat inatsimmi pineqartut tassaapput kiassarnermut innaallagissiornermullu imaluunniit motorinut ikummatissatut nalinginnaasumik atorineqartartut tamarmik. Nukissiuutit atavartut, soorlu seqernup qinngorneranik, anorip nukinganik erngullu nukinganik nukissiuutit inatsimmi pineqanngillat.

Ikummatissat inatsimmi pineqartut kiassarnermut innaallagissiornermullu imaluunniit motorinut ikummatissatut atorineqarnerat akitsuusigaanissaannut aalajangiisuvoq. Ikummatissat taakku siunertanut allanut atorineqarpata inatsimmi maleruagassat naapertorlugit akitsuuserneqassanngillat.

Assersuutigalugu uuliat, smøreuuliatut atugaq, terpentiiina qalipaatinut imerpallaatitut qalipaannermiluunniit atortunik saligutitut atorineqartoq, renebenziina eqqiaanermut atatillugu atugaq, gassi illup qaavanik pappialarsualersuinermit atugaq, gassit puiaasamiittut aamarsuillu siaasaanermi atukkat akitsuuserneqassanngillat. Kisiannili ikummatissat assersuutigalugu smøreulia, terpentiiina, renebenziina, gassi puiaasamiittuunngitsoq, aamarsuit siaasaanermi atortut kiassarnermi, innaallagissiornermi imaluunniit motorinut ikummatissatut atorineqarpata akitsuummik akiliisoqassaaq, naak ikummatissat tamakku taamatut atugassatut naatsorsuussaangikkaluartut.

Ikummatissat nukissiorfinni angisuuni, soorlu Nukissiorfiit innaallagissiorfiini, imaluunniit mikinerusuni, soorlu illuinaat oliefyriini imaluunniit mikisuni, soorlu kiassaatinu petruuliuortuni atorineqarnerat apeqputaatinnagu akitsuummik akiliisoqassaaq.

Kiassarneq, innaallagiaq imaluunniit motorinut ikummatissaq inuussutissarsiuutigalugu tunisassiornermi atorineqaraluarpalluunniit akitsuummik akiliisoqassaaq. Kiassarneq, innaallagiaq imaluunniit motorinut ikummatissaq suliffeqarfiup tunisassiornerani akuugaluarpalluunniit akitsuummik akiliisussaatitaannginneq imaluunniit akitsuummik utertitsineq atuunnavianngillat, taamaattorli tak. akitsuummik akiliisussaatitaanngitsut pillugit siunnersuummi § 9-mi imikkut aalajangersakkat.

Imm. 2-mut

Ikummatissat assigiinngitsut akitsuutaasa annertussusii imm. 2-mi aalajangersarneqarput. Akitsuutit annertussusiinik aalajangersaanermi ikummatissat assigiinngitsut tallimat taakku agguaqatigiissitsinikkut nukimmik pilersitsisinnaanerat aallaavigineqarpoq, taamaaliornikkut ikummatissat taakku tallimat tonsimut gigajoul-imik uuttorlugit assigiikannersumik akitsuuserneqarlutik. Ikummatissat nukimmik pilersitsisinnaanerat aallaavigigaanni assersuutigalugu

solaarimik 1 tonsimik atuinermi akitsuutip aamarsuarnik 1 tonsimik atuinermi akitsuut amerlanertigut naligissavaa.

Ikummatissanut, tassa uulianut aatsitassanit pisunut, aamarsuarnut gassinullu immikkoortitikanut ilaapput ikummatissat assigiinngitsut arlalissuit. Paasiuminartumik aaqqissuussinissaq qulakkeerniarlugu inatsimmi aallaagivineqarput immikkoortunut tallimanut akitsuutit, ikummatissalli assigiinngitsut suugalulluunniit taakku iluanni pineqarput.

Nioqqutissat liiterimut akitsuutillit nunami maani akitsuutaat 15° C –inik kissassuseqarlutik imaqqortussusiannik uuttuineq naapertorlugu akilerneqassaaq. Ikummatissat qanoq kissassusilimmiitneqarnerat apeqqutaatillugu imaqqortussusiisa allanngorarsinnaanerata tamatumani eqqarsaatigineqarpoq.

Gassi silaannaap naqitsinera nalinginnaasooq (Nm³) aallaavigalugu kubikmeterimut uuttorneqassaaq. Uanissaaq gassip qanoq naqitsinilimmiitneqarnera apeqqutaatillugu imaqqortussusiata allanngorarsinnaanera eqqarsaatigineqarpoq.

Imm. 3-mut

Ikummatissat imm. 2-mi taagorneqartut kiassarnermut, innaallagissiornermullu imaluunniit motorinut ikummatissatut atugassatut akuleriissinneqarpata imaluunniit nioqqutissanik allanik akoorneqarpata akuugaq siunnersuummi imm. 3 malillugu akitsuut annerpaaq atorlugu akitsuuserneqassaaq. Taamaattoqartillugu akuukkap annertussusia tamarmiusooq akitsuuserneqassaaq, imarisaata qanoq agguataagaanera apeqqutaatinnagu.

Imm. 4-mut

Kisianni uuliakoq kiassarnermut innaallagissiornermullu atorneqarpat, uuliakup imermik akullip akitsuutaa imm. 4 malillugu appartinneqassaaq. Appaaneq kisitsisit erseqqinnerusumik aalajangersarneqarsimasut najoqqutaralugit pissaaq. Aalajangersakkakut qulakkeerniarneqarpoq uuliakup kiassarnermut innaallagissiornermullu atorneqarnerata imminut akilersinnaajuarnissaa.

Imm. 5-imut

Suliffeqarfiit, aatsitassat pillugit ingerlatallu tamatumunnga pingaaruteqartut pillugit Inatsisartut inatsisaat naapertorlugu akuersissuteqarfigineqartut akit imm. 2-miit 4-mut taaneqartut 10 procentiannik akitsuuteqartinneqarnissaat imm. 5-imi siunnersuutigineqarpoq. Tamatumani suliffissuit aatsitassanik piiaaffiit imminut akilersinnaasumik ingerlanneqarsinnaanerisa maannakkorpiaq qularnartoqarnerat kiisalu ikummatissat annertunerpaartaasa avammut nioqqutissanik piiaanermi tunisassiornermilu atorneqartussaanerata eqqarsaatigineqarput.

§ 2-mut

Imm. 1-imut

Nioqqutissat Kalaallit Nunaanni piiakkat sulialluunniit imaluunniit Kalaallit Nunaanni akitsuuteqarfiusumut eqqunneqarnerminni allanut atugassatut naatsorsuussat kiassarnermut innaallagissiornermullu imaluunniit motorimut ikummatissatut atugassanngortinneqarpata akitsuummik akiliisussaataitanerup atuutilernissaa siunnersuutaavoq.

Aalajangersagaq ilaatigut atorneqassaaq Kalaallit Nunaanni aamarsuarnik, uuliamik gassimilluunniit paaasoqarpat nunami maani kiassarnermut innaallagissiornermullu atugassanngortinneqartunik. Aalajangersagaq aammattaaq atorneqassaaq Kalaallit Nunaanni assersuutigalugu uuliamik akuiaaffiliortoqarpat benziinamik assigisaanillu suliaqartumik nunamilu maani tuniarneqartunik. Aammattaaq aalajangersagaq atorneqassaaq ikummatissaaq akitsuuteqarfiusumut eqqunneqarnermini allanut atugassatut naatsorsuussaagaluarluni kingusinnerusukkut kiassarnermut, innaallagissiornermut imaluunniit motorimut ikummatissatut atorneqarpat. Nioqqutissanik eqqussuineq annissuinerlu pillugit Inatsisartut inatsisaanni § 6 naapertorlugu akitsuuteqarfik tassaavoq Kalaallit Nunaata nunataa, imartaa, taaneqartullu silaannartaat. Akitsuuteqarfiusumullu ilaanngillat Kalaallit Nunaata illersorneqarnissaa pillugu isumaqatigiissut 27. april 1951-imeersoq naapertorlugu illersornissamut sakkutooqarfiusut.

Imm. 2-mut

Nioqqutissaaq akitsuuteqarfiusumut eqqunneqarnermini kiassarnermut, innaallagissiornermut imaluunniit motorinut ikummatissatut naatsorsuussaappat akitsuummik akiliisussaataitanerup imm. 2 malillugu eqqussinermi atuutilissaaq.

Imm. 3-mut

Akitsuut siunnersuummi imm. 3 naapertorlugu akilernerqartussanngussaaq akitsuummik akiliisussaataitanerup atuutilernerani. Piffissamik akilernerqartussanngorfianik aalajangiinikkut qulakkeerniarneqarneruvoq akileraaruseriffiup aningaasanik suliffeqarfinnut pineqartunut tunniussisoqassatillugu pisariaqassappat ilanngaassisinnaanissaa.

§ 3-mut

Imm. 1-imut

Siunnersuutigineqarpoq suliffeqarfiit inuussutissarsiummik ingerlatsinerminnut atatillugu nioqqutissanik akitsuusigassanik paaasut, suliaqartut imaluunniit eqqussuisut uninngasuutinik peqqumaasivittut nalunaarsorneqaqqullutik akileraaruseriffimmut nalunaartassasut.

Uninngasuutinik peqqumaasivittut nalunaarsorneqartussaataitaasut taamaallaat tassaapput suliffeqarfiit inuussutissarsiummik ingerlatsinerminnut atatillugu nioqqutissanik akitsuusigassanik paaasut, suliaqartut imaluunniit eqqussuisut. Suliffeqarfiit inuilluunniit ataasiakkaat, assersuutigalugu qalipaasutut sulinerminni terpentiinamik eqqussuisut nalunaarsortinnissamut piisussaataitanngillat, kingusinnerusukkulluunniit terpentiina kiassarnermut assigisaanulluunniit atoraluarunikku.

Suliffeqarfiit nalunaarsorneqartussaataasut naatsorsuusiornissamik assigisaanillu arlaqartunik pisussaaffiligaapput, aammattaarli periarfissaqartitaallutik piffissanut aalajangersimasunut akitsuutunik naatsorsuinissamut akiliinissamullu.

Imm. 2-mut

Suliffeqarfiit nioqqutissanik akitsuusigassanik atuisuusut, aammalu minnerpaamik 1.000 m³-mik peqqumaasiveqartut imm. 2 naapertorlugu nalunaarsorneqaqqullutik nalunaarsinnaapput, suliffeqarfiilli taamaattut nalunaarsorneqartussaataaangillat.

Uninngasuutunik peqqumaasiviit imarisaannik naatsorsuineri ilanngunneqassapput suliffeqarfiit sumiiffinni ataasiakkaani uninngasuutaat, tassa eqqussukkat uninngasuutit assigisaasalu saniatigut. Tuniniaaqqiffiit, soorlu orsersortarfiit uninngasuutunik peqqumaasiviit imarisaannik naatsorsuineri ilanngunneqassanngillat.

Suliffeqarfiit arlallit uninngasuutunik peqqumaasivik, assersuutigalugu tankeqarfik angisooq ataatsimoorussarippassuk, taava suliffeqarfiit ataasiakkaat akitsuummik, uninngasuutunik peqqumaasiviup imarisaanik atuinerminnut naapertuuttumik akiliissapput.

Suliffeqarfiit inuillu ataasiakkaat imm. 1 naapertorlugu nalunaarsorneqartussaataaernerimi imaluunniit imm. 2 naapertorlugu nammineq piumasutsimik nalunaarsorneqarsinnaanermi pineqanngitsut uninngasuutunik peqqumaasivittut nalunaarsorneqarsinnaanngillat, kisiannili § 4 naapertorlugu akitsuummik nalunaaruteqassallutik.

Imm. 3-mut

Uninngasuutunik peqqumaasivittut nalunaarsorneqarnissaq pillugu aalajangersakkat erseqqinnerusut Naalakkersuisut imm. 3 naapertorlugu aalajangersarsinnaavaat. Taakkununnga ilanngullugit Naalakkersuisut aalajangersarsinnaavaat nalunaarsorneqarnissamut piffissaritit, immersugassanik atuinissamut piunasaqaatit allallu allaffissornermut tunngassuteqarsinnaasut.

§ 4-mut

Suliffeqarfiit aamma ingerlatsiviit assigisaallu uninngasuutunik peqqumaasivittut nalunaarsorneqarsimangitsut, kiisalu inuit ataasiakkaat akitsuummik akiliisussaataanerup atuutilernerani tamatigut akileraaruseriffimmut nalunaaruteqartassapput, tak. siunnersuummi § 2. Akitsuummik nalunaaruteqarneq kingusinnerpaamik pissaaq akitsuummik akiliisussaataanerup atuutilerfiani.

§ 5-mut

Imm. 1-imut

Siunnersuutigineqarpoq Akileraaruseriffik piginnaatinneqassasoq uninngasuutinik peqqumaasivittut nalunaarsorsimasut akitsuusigaanngitsumik uninngasuuteqarnissamut akuersissummik tuninissaannut. Akitsuusigaanngitsumik uninngasuutit taamallaat tassaasinnaapput nioqqutissat akitsuusigassat akitsuuteqarfiup avataanut anninneqartussatut naatsorsuussat, aammalu nioqqutissat § 9 naapertorlugu akitsuusernagit nioqqutigineqartussat.

Akitsuusigaanngitsumik uninngasuutitut tunngatillugu sumi uninngasuuteqarnissaq naatsorsuinerlu pillugit piumasaqaateqartoqarsinnaavoq.

Akitsuusigaanngitsumik uninngasuutit sumiitinneqarnissaat pineqartillugu tassaasinnaapput tanki tankeqarfilluunniit aalajangersimasoq ataaseq arlaqartulluunniit, nioqqutissallu peqqumaasivimmuut inissinneqartut uninngasuutinik peqqumaaviviusup nioqqutissaataanit allanit avissaartinneqarsimassallutik. Akitsuusigaanngitsumik uninngasuutit pillugit naatsorsuineq pineqartillugu nioqqutissat uninngasuutinik peqqumaaviviusup nioqqutissaataanit allanit avissaartinneqarsimassanngillat.

Akileraaruseriffik akitsuusigaanngitsumik uninngasuuteqarnissamut akuersissummik tunisnerminut atatillugu akitsuusigaanngitsumik uninngasuutit pillugit piumasaqaateqarsinnaavoq. Akileraaruseriffiup tamanna pillugu aalajangiinerani tunngaviviusaaq ataatsimut naliliineq, tassa ilaatigut nalilerneqassallutik nioqqutissat akitsuusigassaanngitsut akitsuuteqarfiusumi tuniarneqaratarsinnaanerat, nioqqutissat akitsuusigaanngitsumik uninngasuutitut inissinneqartussat annertussusissaannut naatsorsuutigisat, uninngasuutinik peqqumaasiviviusup akileraartarnermut, akitsuusiisarnermut akiliisitsiniartarnermullu inatsisit naapertorlugit pisussaaffimminik malinninnera pillugu akileraaruseriffiup misilittagai, uninngasuutinik peqqumaasiviviusup aningaasaqarniarneranut tunngasut, matumani aamma pingaartumik pineqarluni uninngasuutinik peqqumaasiviviusoq akiligassanik pisortat pisassaannik akiitsoqarnersoq.

Akitsuusigaanngitsumik uninngasuutit taamaallaat annertussuserisinnaavaat akitsuuteqarfiup avataanut anninneqartussatut naatsorsuutigisat imaluunniit § 9 naapertorlugu akitsuuteqanngitsumik tunineqartussatut naatsorsuutigisat annertoqqataat. Akileraaruseriffiup akuersissuuteqarnermini uninngasuutinik peqqumaasiviviusup akitsuuteqanngitsumik uninngasuutigisinnaasaasa annerpaaffissaat aalajangersinnaavaa.

Imm. 2-mut

Imm. 2-mi siunnersuutigineqarpoq Naalakkersuisut akitsuusigaanngitsumik uninngasuutit pillugit erseqqinnerusunik maleruagassiornissamut piginnaatinneqassasut. Naalakkersuisut matumani aamma naatsorsuusiornermi nakkutilliinermilu maleruagassiorsinnaapput, akuersissuuteqarnissamut piumasaqaasiorsinnaallutik akitsuutillu akilerneqarnissaata qulakkeernissaannut pingaarutillit allat aalajangersarsinnaallugit. Aammattaaq Naalakkersuisut akuersissutinik tunisinermut atatillugu qularnaveeqqusiinissamik piumasaqaateqarsinnaaneq pillugu maleruagassiorsinnaapput.

§ 6-mut

Siunnersuutigineqarpoq uninngasuutinik peqqumaasivittut nalunaarsorneqarsimasut piffissaq akitsuusiiffissaat tassaassasoq qaammatisiutit malillugit qaammat.

§ 7-imut

Imm. 1-imut

Suliffeqarfiit uninngasuutinik peqqumaasivittut nalunaarsorneqarsimasut piffissat akitsuusiiffissat, tassa imaappoq qaammatisiutit malillugit qaammatit tamaasa akitsuusigassat annertussusiinik naatsorsuisassapput.

Piffissami akitsuusiiffissami akitsuusigassat tassaapput nioqqutissat akitsuusigassat kiassarnermut, innaallagissiornermut imaluunniit motorimut ikummatissatut atorneqarsimasut millissutinik assigisaannillu taperlugit, tak. inatsisissatut siunnersuummi § 2, imm. 1, imaluunniit akitsuuteqarfiusumut eqqunneqarsimasut, tak. inatsisissatut siunnersuummi § 2, imm. 2. Taasuma saniatigut ilanngaatigineqassapput nioqqutissat akitsuusigassat § 5, imm. 1 naapertorlugu akitsuusigaanngitsumik uninngasuutinut ilassutaasimasut, nioqqutissammi taakku tassuunakkut akitsuuserneqassanngillat, aatsaalli akitsuusigassanngussallutik kiassarnermut, innaallagissiornermut imaluunniit motorinut ikummatissatut atorneqarunik. Taamatut pisoqartillugu inatsimmi maleruagassat nalinginnaasut naapertorlugit akitsuummik akiliisoqassaaq, tak. siunnersuummi § 2, imm. 1.

Nioqqutissat akitsuusigassat assigiinngitsut annertussusii tamaasa immikkut naatsorsorneqassapput.

Piiaanerup, eqqussuinerup assigisaatalu suliffeqarfiup nammineq akiligaanik allalluunniit akiligaanik pisimamera, imaluunniit nioqqutissat isumaqatigiissuteqarnikkut nioqqutigeqqitassatut allatulluunniit inaarutaasumik tunineqarsimanerat tunniunneqarsimaneralluunniit apeqqu-taanngilaq.

Nioqqutissanit akitsuusigassanit ilanngaatigineqassapput nioqqutissat § 8-mi, tak. § 9, aalajangersakkat naapertorlugit akitsuutitaqanngitsumik tunniunneqarsimasut, kisianni akiligassalitsigut annaaneqartut ilanngaatigineqarsinnaanngillat.

Imm. 2-mut

Imm. 2-mi erseqqissarneqarpoq uninngasuutinik peqqumaasiviusut pineqartinnagit akitsuusigassat tassaasut nioqqutissat suliffeqarfiup imaluunniit inuup pisuni ataasiakkaani pissarsiarisimasai tigusimasaaluunniit.

Imm. 3-mut

Imm. 3-mi siunnersuutigineqarpoq uninngasuutiniq peqqumaasivittut nalunaarsorneqarsimasut akitsuusigassanik qanoq naatsorsuisarnissaat pillugu maleruagassanik erseqqinnerusunik Naalakkersuisut aalajangersaanissamut piginnaatinneqassasut.

§ 8-mut

Imm. 1-imut

Siunnersuutigineqarpoq uninngasuutiniq peqqumaasivittut nalunaarsorneqarsimasut § 7, imm. 1 naapertorlugu naatsorsuinerminni nioqqutissat akitsuuteqarfiusup avataanut anninneqartut, nioqqutissat § 9 naapertorlugu akitsuusigassaangitsut, aammalu nioqqutissat suliffeqarfimmi imaluunniit suliffeqarfimmut suliffeqarfimmiilluunniit assartorneqarneranni ikuallattoqarnera, erngartoqarnera assigisaaluunniit pissutigalugu annaaneqartut ilanngaatigisinnaagaat.

Imm. 2-mut

§ 7, imm. 1 naapertorlugu naatsorsuinerminni nioqqutissat imm. 1-imi taaneqartunut tunineqarnissaat siunertaralugu akitsuusigaangitsumik uninngasuutiniq peerneqartut siunnersuummi imm. 2 naapertorlugu ilanngaatigineqarsinnaangillat.

§ 9-mut

Imm. 1-imut

Uninngasuutiniq peqqumaasivittut nalunaarsorneqarsimasut nioqqutissanik umiarsuarnut timmisartunullu nunanut allanut ingerlaartunut tunisaqarneranni akitsuusiisoqassanngitsoq aalajangersakkatut siunnersuutigineqartumi allassimavoq.

Umiarsuit nunanut allanut ingerlaartutut isigineqartut ilaatigut tassaapput Royal Arctic Line A/S-ip umiarsuaatai atlantikoq ikaarlugu ingerlaartut aamma umiarsuit takornarianik angallasissutit Kalaallit Nunaanneersut nunanillu allaneersut, umiarsuit uuliasiortut gassisiortullu Kalaallit Nunaata avataani angerlarsimaffeqartut allallu. Akitsuusiisoqannginnissaanili pineqanngillat umiarsuit Kalaallit Nunaata iluani ingerlaartut, matumani aamma umiarsuit ilaasartaatit umiarsuillu pilersuinerminni atorineqartut.

Angallatitut uuliasiortutut gassisiortutullu isigineqarput umiarsuit uuliasiornermi gassisiornermilu peqataanissamut immikkut sanaajusimasut atortulersorneqarsimasulluunniit. Aalajangersakkami ilaatigut pineqarput umiarsuit qillerutitut atorineqartut aamma umiarsuit sajuppillatsitsisarlungi misissuinerminni allanullu atugassatut atortulersorneqarsimasut.

Timmisartut nunanut allanut ingerlaartutut isigineqartut tassaapput timmisartut suulluunniit, matumani aamma timmisartut Kalaallit Nunaanni angerlarsimaffeqartutut nalunaarsorsimasut, nunami allami timmisartunut mittarfimmik toraagaqarlutik tingisut. Akitsuusiisoqannginnissaani pineqanngillat Kalaallit Nunaanni timmisartunut mittarfiit, heliportit aallallu akornanni timmisartornerit.

Aamma aalisariutit Kalaallit Nunaanni angerlarsimaffeqanngitsut kiisalu aalisariutit 200 bruttotonnage-mik imaluunniit bruttoregister-tonnage-mik taannalu qaangerlugu usisinnaasut, Kalaallit Nunaanni angerlarsimaffeqartut tamarmik akitsuusiisoqannginnissaani pineqartunut ilaanissaat siunnersuutaavoq.

Akitsuusiinnginnissaq umiarsuit timmisatullu pineqartut Kalaallit Nunaata avataani akitsuuteqanngitsumik orsersorsinnaanerannik tunngaveqarpoq, taamaattumillu angallatit taakku akitsuutit akiliisussaatinneqarnissaat suallaataanaviarani.

Kisianni aatsitassanik piiiaffinnut, aalisariutitut minnernut assigisaannullu orsussamik tunisniami akitsuummik akiliisussaatitaannginnissaq siunnersuutaanngilaq, tassami ilaatigut eqqarsaatigineqarmat ingerlatat taakku avatangiisinut sunniisarnerat sunniisinnaanerallu annikinngimmat, ilaatigullu aamma siunnersuutip isertitaqarnissamut siunertaa eqqarsaatigineqarmat.

Taamaattorli aatsitassanik piiiaffinnut tunngatillugu siunnersuutigineqarpoq akitsuutip anner-tussusii 10 procentimut appartinneqassasut, tassami ikummatissat agguaqatigiissillugu anner-tunerpaartaat avammut nioqqtissanik (aatsitassanik) piiaanermi tunisassiornermilu atorneqar-tussaammata, aammalu Kalaallit Nunaanni ingerlatat taamaattut imminut akilersinnaasumik ingerlanneqarsinnaanerat maannakkorpiaq qularnartorujussuummat.

Imm. 2-mut

Imm. 2-mi erseqqissarneqarpoq akitsuusiinnginnissami taamaallaat pineqarmata nioqqtissat umiarsuup, timmisartup, aalisariutilluunniit orsussaasivianut toqqaannartumik tunineqartut. Umiarsuaq arlalinnik orsussaasiveqarpat nioqqtissat orsussaasivimmut motoorimut atasumut tunineqartut kisimik akitsuuserneqassanngillat, orsussaasivinnulli allanut tunineqartut akitsuusi-gassaassallutik.

Imm. 3-mut

Naalakkersuisut akitsuummik akiliisussaatitaannginnernut atatillugu naatsorsuusiormi nak-kutilliinermilu maleruagassanik aalajangersaanissamut piginnaatinneqarnissaat siunnersuutaavoq.

§ 10-mut

Imm. 1-imut

Kikkut akitsuummik akiliisussaatitaanerat aalajangersakkami pineqarpoq. Pisuni § 2, imm. 1-imi taaneqartuni tassaavoq akitsuummik akiliisussaatitaanerup atuutilernerani nioqqtissamik piginnittoq.

Imm. 2-mut

Kikkut akitsuummik akiliisussaataitanerat aalajangersakkami pineqarpoq. Pisuni § 2, imm. 2-mi taaneqartuni tassaavoq akitsuummik akiliisussaataitanerup atuutilernerani nioqqutissamik pigisaqalersutut nalunaarneqarsimasoq.

Nioqqutissamik pigisaqalersoq nalinginnaasumik tassaavoq nassiussat allagartaat assigisaallu malillugit nioqqutissamik tiguisutut nalunaarneqarsimasoq, pisumi erseqqisumik allasimangippat nioqqutissamik tiguisusaaq nioqqutissap inuttassavia sinnerlugu iliuseqarsimasoq. Taamaattoqarsinnaaneranut assersuutigineqarsinnaavoq sulisorisap aqqata nassiussat allagartaanni assigisaannilu nalunaarneqarsimanera, kisiannili erseqqisooq tassaalluni sulisorisaaq suliffeqarfik atorfeqarfigisani sinnerlugu iliuseqarsimasoq.

§ 11-mut

Imm. 1-imut

Suliffeqarfiit § 3, imm. 1 naapertorlugu nalunaarsorneqarsimasut naatsorsuusiussapput, nioqqutissat assigiinngitsut immikkoortillugit akitsuusigassat annertussusiinik naatsorsuinissamut tunngaviusinnaasunik. Tamanna aamma atuuppoq uuliakunut umiarsuarneersunut imermik qanoq akoqartiginerat apeqqutaatillugu immikkoortillugit.

Naatsorsuutini ilaatinneqassapput nioqqutissat piarneqartut, suliarineqartut eqqussorneqartut amerlissutaat imaluunniit akitsuusigaanngitsumik uninngasuutit ikilissutaat, kiisalu nioqqutissat § 9, imm. 1 naapertorlugu tunineqartut atorneqartullu.

Imm. 2-mut

Uninngasuutinik peqqumaasivittut § 3, imm. 2 naapertorlugu nalunaarsorneqarsimasut naatsorsuusiussapput nioqqutissat amerlissutaat aamma § 9, imm. 1 naapertorlugu tunisat atukkalilu ilanngullugit.

Imm. 3-mut

Aammattaaq siunnersuutigineqarpoq nioqqutissanik akitsuusigassanik tunisaqarnernut atuinernullu tamanut atatillugu pisiat allagartaasa paasissutissanik sunik imaqaarnissaat aalajangersarneqassasoq. Pisiat allagartaanni paasissutissatut allasimassapput ulloq akiligassat allagartaata sananeqarfia, nioqqutissanik tunisisup aqqa, pisisup aqqa, nioqqutissap sumut tunniunneqarnera, nioqqutissap suunera annertussusialu kiisalu akitsuutip annertussusia.

Naatsorsuusiornissamut, pisiat allagartaannut assigisaannullu tunngatillugu piumasaqaatit aalajangersakkami uani aalajangersarneqartut kingunerisaannik suliffeqarfiit pineqartut pisisaajunnaarsinneqanngillat pisiat allagartaat, naatsorsuuserineq, toqqortarinninnisaaq naatsorsuusiernerlu pillugit maleruagassanik inatsisini allani aalajangersarneqarsimasinnaasunik mallinnissamut.

Imm. 4-mut

Suliffeqarfiup naatsorsuutit pappialartaallu ukiup naatsorsuusiorfiusup naanerata kingorna si-
vikinnerpaamik ukiuni tallimani toqqortarissavai.

§ 12-mut

Imm. 1-imut

Siunnersuutigineqarpoq uninngasuutinik peqqumaasivittut nalunaarsorneqarsimasut piffissat akitsuusiiffissat naanerisa kingorna kingusinnerpaamik qaammatit ulluisa 15-ianni nioqqutis-
sat akitsuusigassat qanoq annertutigineri nalunaarutigisassagaat. Annertussusii § 7, imm. 1-
imi aamma § 8-mi maleruagassat naapertorlugit naatsorsorneqassapput. Akitsuut piffissat
akitsuusiiffissat naanerisa kingorna kingusinnerpaamik qaammatit arfinilissaata ulluisa 15-
ianni akileraaruseriffimmut akilerneqartassaaq.

Imm. 2-mut

Akitsuummik akiliisussaataitasut § 4-mi pineqartut akitsuut, akitsuummik akiliisussaataitane-
rup atuutilernerata kingorna kingusinnerpaamik ullut 14-it qaangiunneranni akileraaruserif-
fimmut akilertassavaat. Akitsuusigassat annertussusiinik naatsorsuineq § 7, imm. 2-mi male-
ruagassat naapertorlugit pissaaq.

Aningaasat kingusinnerpaamik ullormi piffissaagallartillugu akiliiffissami allakkerisarfimmut
aningaaserivimmulluunniit akilerneqarpata imaluunniit nuusseqqusilluni qinnuigininneq su-
liffeqarfiup aningaaserivianit tiguneqarpat, taamaalillunilu suliffeqarfiup kontuaniit akileraa-
ruseriffimmut kingusinnerpaamik ullormi piffissaagallartillugu akiliiffissami nuussisoqarpat,
taava akiliineq piffissaagallartillugu akiliinertut isigineqassaaq.

§ 13-mut

Uninngasuutinik peqqumaasivittut nalunaarsorneqarsimasup akitsuut piffissaagallartillugu
akilinngippagu, akileraaruseriffiup uninngasuutinik peqqumaasiviusoq peqqusinnaavaa nioq-
qutissat tiguneranni erngerluni nalunaaruteqartaleqqullugu akitsuummillu akiliisaleqqullugu.

§ 14-mut

Imm. 1-imut

Siunnersuutigineqarpoq nioqqutissanik akitsuusigassanik, akitsuummik inatsit naapertorlugu
akilerneqarsimasussaagaluamik akiliinani tunisisoqartillugu, piginnittoqalersillugu atuisoqar-
tilluguluunniit aningaasat akilinngitsoorneqarsimasut akileeqqusinermik nalunaarfigineqar-
nermiit kingusinnerpaamik ullut 14-it qaangiunneranni akileqquneqartassasut.

Aningaasat akilinngitsoorneqarsimasut annertussusiat suliffeqarfiup naatsorsuutai tunngaviga-
lugit naatsorsorneqarsinnaangippat, akileraaruseriffiup missingersuinermigut angissusilersin-
naavaa.

Imm. 2-mut

Nioqqutissat akitsuusigassat § 9 naapertorlugu akitsuusigassaajunnaartut atorneqarfissaminnut naatsorsuussamit allaasumut atorneqarpata, suliffeqarfiup nioqqutissanik akitsuuteqanngitsumik pisisinnaanera akileraaruseriffiup atorunnaarsissinnaavaa. Aamma nioqqutissat taaneqartut akitsuutaat akileeqqusinnermiit kingusinnerpaamik ullut 14-it qaangiunneranni akileqqullugu suliffeqarfik peqquneqassaaq.

Imm. 3-mut

Atorunnaarsitsineq pissaaq akileraaruseriffiup uninngasuutinik peqqumaasivittut nalunaarsorneqarsimasunut nalunaarfiginninneratigut, suliffeqarfiup pineqartup nioqqutissanik akitsuuteqanngitsunik siunissami tunisiffigineqarsinnaassannginneranik.

§ 15-imut

Imm. 1-imut

Siunnersuutigineqarpoq kinaluunniit piaaraluneerluni imaluunniit mianersuaalliorujussuarluni akitsuutinik nakkutilliinermi atugassanik imaluunniit akitsuummik utertitassamik tunniussinissamut tunngavissaq pillugu eqqunngitsunik paasinerluutaasinnaasunilluunniit paasissutissiisoq imaluunniit paasissutissanik nipangiussisoq akiliisitaanermik pineqaatissinneqarsinnaassasoq.

Aalajangersakkap piaaraluneerluni imaluunniit mianersuaalliorujussuarluni akitsuutinik nakkutilliinermi atugassanik imaluunniit akitsuummik utertitassamik tunniussinissamut tunngavissaq pillugu eqqunngitsunik paasinerluutaasinnaasunilluunniit paasissutissiineq imaluunniit paasissutissanik nipangiussineq pinerluuteqarsimanertut isigineqalersippai.

Aalajangersakkami piaaraluneerluni-mik taaguutip danskit pinerluuteqarsimasunik pillaasarnermut inatsisaanni piaaraluneerluni-mik taaguutit assigai, aamma taamaappoq mianersuaalliorujussarluni-mik taaguummot tunngatillugu.

Imm. 1, nr. 1-imut

Eqqunngitsutut isigineqarpoq paasissutissiisup paasissutissat ilumut eqqunngitsuunerat ilisimagaluarlugu, eqqunngitsuunerat ilimagilluinnaraluarlugu taamaassoriinnaraluarluguluunniit taamatut iliornera. Paasissutissat eqqunngitsut akileraaruseriffiup paasinerluinissaanut atorneqarsinnaanerat pineqaatissiinissami aalajangiisuunngilaq.

Paasissutissatut paasinerluutaasinnaasutut isigineqarput paasissutissat imminni eqqortuugaluit nipangiussinernik tamakkiisuunngitsunillu paasissutissiinernik ilaartukkat, akileraaruseriffiullu salloqittarniarneqarneranik kinguneqartut.

Unioqutitsinertut isigineqassaaq paasissutissanik eqqunngitsunik paasinerluutaasinnaasunilluunniit paasissutissiineq paasissutissanilluunniit tunniussinnginneq. Akitsuutinik nalunaarutiginninnermi kukkusumik amigaatilimmilluunniit paasissutissiisimanermik toqqammavissarsiornerit utoqqatsissutissaanngillat.

Imm. 1, nr. 2-mut

Siunnersuutigineqarportaaq kinaluunniit piaaraluneerluni imaluunniit mianersuaalliorujussuarluni § 3, imm. 1-imik, uninngasuutinik peqqumaasivittut nalunaarsortittussaannermut tunngasumik, § 4-mik, akitsuummik nalunaarutiginnittussaannermut tunngasumik, § 5, imm. 1-imik, akitsuusigaanngitsumik uninngasuuteqarnermut tunngasumik, imaluunniit § 11, imm. 1-imiit 4-mut, naatsorsuusiormut naatsorsuutinillu toqqortaqaarnissamut tunngasunik unioqutitsisoq akiliisitaanermik pineqaatissinneqarsinnaassasoq.

Imm. 1, nr. 3-mut

Aammattaaq siunnersuutigineqarpoq kinaluunniit piaaraluneerluni imaluunniit mianersuaalliorujussuarluni § 13-imi oqaaseqatigiinni siullerni allassimasumik, akitsuummik nalunaarutiginninnissap akiliinissallu siuartinneqarnissaannik peqqusinnermik malinninngitsoq akiliisitaanermik pineqaatissinneqarsinnaassasoq.

Imm. 1, nr. 4-mut

Kiisalu siunnersuutigineqarpoq kinaluunniit piaaraluneerluni imaluunniit mianersuaalliorujussuarluni nioqutissanik akitsuusigassanik, akitsuummik inatsit naaportorlugu akilerneqarsimasussaagaluumik akiliinani tunisisoq, pigisaqalersoq, pissarsisoq imaluunniit atuisoq, taamaalioriaraluartorluunniit akiliisitaanermik pineqaatissinneqarsinnaassasoq.

Imm. 2-mut

Selskabit assigisaallu imm.1-imik unioqutitsisut Kalaallit Nunaanni pinerluttulerinnermik inatsimmi kapitali 5-imi maleruagassat naaportorlugit pinerluutinut akisussaatinneqarlutik akiliisitaanermik pineqaatissinneqarsinnaapput.

§ 16-imut

Imm. 1-imut

Siunnersuummi § 16-ikkut siunnersuutigineqarpoq unioqutitsineq pillugu suliassaq eqqartuussisutigoortitsinertaqaanngitsumik inerneqarsinnaasoq, pineqartup ilumut unioqutitsisimani paasippagu akiliutissallu annertussusia akuerippagu.

Imm. 2-mut

Imm. 1 naaportorlugu paasisitsissummut tunngatillugu atuutissapput Kalaallit Nunaanni eqqartuussisarnermik inatsimmi maleruagassat.

Imm. 3-mut

Akiliutissaq piffissaagallartillugu akilerneqarpat imaluunniit tiguniarneqarsimappat qanoq iliuuseqartoqaqqissanngilaq.

§ 17-imut

Imm. 1-imut

§ 17-imi siunnersuutaavoq akiliisitaanermik pineqaatissiisarnert pillugit maleruagassanik, maleruagassiani inatsit naapertorlugu atulersinneqarsimasuni aalajangersaasoqarsinnaasoq.

Imm. 2-mut

Selskabit assigisaallu imm.1-imik unioqqutitsisut Kalaallit Nunaanni pinerluttulerinermik inatsimmi kapitali 5-imi maleruagassat naapertorlugit pinerluutitut akisussaatinneqarlutik akiliisitaanermik pineqaatissinneqarsinnaapput.

§ 18-imut

Inatsimmik maleruagassianilluunniit inatsit naapertorlugu atulersinneqarsimasunik unioqqutitsinernut pineqaatissiissutitut akiliisitsissutitut inatsisissatut siunnersuummi § 18 naapertorlugu landskarsip pisassarai.

§ 19-imut

Siunnersuutigineqarpoq inatsit 1. januar 2011-imi atortuulissasoq, atuutissasorlu nioqqutissanut 1. januar 2011-miit kingusinnerusukkulluunniit akitsuusigassaalersussanut.